

東
華
續
錄

東華續錄

同治七十九

臣王先謙敬編

臣張式恭恭校

六月辛丑朔諭軍機大臣等恩麟奏密陳抵藏查明大概情形等語據稱諾們罕年近七旬不甚講求公事著恩麟隨時留心察看據實具奏前歲廓爾喀貢使回藏頗露不遜情狀該夷恭順已久恩麟務當妥爲駕馭毋使別生枝節尤宜不動聲色嚴密防閑披楞廓爾喀等國毗連藏地往來貿易日久相安何以該夷等與唐古特不甚相洽時存挾制之心儻任其積不相能致開邊釁於大局亦有關繫著恩麟體察情形隨時於交涉事件妥爲區畫以期消患未萌毋稍大意該大臣整頓藏務如番官中有不妥協者卽與該諾們罕商量更換儻另有別情著卽密爲奏聞毋稍徇隱將

此諭令知之○壬寅諭內閣前因山東布政使潘鼎新請假回籍省親當經降旨給假三箇月茲據李鴻章奏該員之母年屆七旬病勢益增懇請續假並先行開缺等語潘鼎新著准其開缺再行賞假兩箇月俟假滿後卽赴左宗棠軍營以資差遣○諭軍機大臣等穆圖善奏通籌全局請飭催馬隊助剿並請飭鮑超酌帶舊部來甘專顧南路各摺片前調吉林黑龍江馬隊據富明阿德英等先後陳奏因存營兵數無多各挑派五百名業已起程赴甘穆圖善於此項馬隊到後卽可斟酌軍情派往助剿以壯聲威左宗棠見已派兵分道入隴並帶親軍馳赴涇州卽著迅速前進恪遵歷次諭旨接受督篆籌辦一切該大臣抵涇接篆後距蘭州尙遠省城防剿事宜應如何嚴密布置之處計早統籌全局著卽迅速奏聞硃口見無賊蹤前諭金順會合張曜宋慶兩軍扼要堵截劉

松山一軍見向花定進發著卽飭令迎頭截擊毋令竄出邊外甯夏回眾久經安撫此次官兵追截竄匪逼近甯靈恐致懷疑驚懼左宗棠務當派員剴切曉諭彈壓撫綏以免別生枝節董志原踞匪竄併金積堡後賊勢若何著卽隨時具奏南路河狄回匪負嵎已久穆圖善以秦州喫緊暫時撤軍回顧左宗棠接篆後著卽酌量情形權衡緩急次第勦辦穆圖善所請調鮑超帶兵赴甘專顧南路之處著毋庸議甘省回匪四處紛擾兼以餉需缺乏穆圖善尙能支持危局力任其難左宗棠與該將軍同辦一事務當和衷共濟隨時商辦以副委任將此由六百里各諭令知之○以孫觀爲廣東按察使由鹽運使遷○癸卯諭軍機大臣等豐紳等奏陝匪竄入甯夏境內城防喫緊回匪撲犯定遠營各摺片董志原回匪由磴口竄擾靈州中衛自河南甯安等堡至甯夏南鄉及甯州同心

堡預旺城等處數百里內徧地皆賊甯夏滿漢城防極形喫重劉松山一軍見向花定進發卽著左宗棠檄飭劉松山迅速前進馳赴甯郡以資救援如劉松山軍尙嫌單薄著仍遵前旨酌派郭寶昌帶隊合軍齊進以資厚集前諭金順會合張曜宋慶兩軍扼要堵剿見在能否統率所部馳援甯夏卽著該署將軍酌量辦理甯夏回眾久經安撫見竄匪滋擾難保不又被煽惑別滋事端著左宗棠懍遵昨日諭旨酌度機宜悉心籌辦豐紳謙禧惟當就見有兵力嚴密守禦不可稍有疏虞昨據穆圖善奏中衛戒嚴已派黃金山帶勇二千馳往防守能否再爲添撥數營協同援剿著該署督妥爲布置回匪分竄蒙旗撲犯定遠營城池應如何抽撥勁旅星馳援應之處著豐紳謙禧咨商左宗棠等相機調度將此由六百里諭知左宗棠穆圖善金順豐紳並傳諭謙禧知之○以文彬

爲山東布政使調李元華爲山東按察使以應寶時爲江蘇按察

使

由蘇松太道遷

○甲辰諭軍機大臣等劉嶽昭奏官軍進剿尋匪大獲

勝仗攻克要險並回目投誠各摺片雲南尋甸賊匪踞險爲巢經總兵全祖凱等督率將弁分路進攻大獲勝仗已將七星橋文筆山章格各隘全行攻克著劉嶽昭乘此得手之際仍嚴飭各該文武激勵將士迅拔州城毋再遲延其尋甸西南塘子集賢村等處二十餘寨均係爲賊所脅塘子回目馬廣具呈投誠該匪旋撫旋變是其慣技此次自拔來歸意圖立功贖罪如果奮勉殺賊自可寬其既往予以自新至尋甸逆目馬添順嵩明逆目李芳沅等畏懼求撫是否出於至誠著該督察看情形相機辦理毋墮奸計致貽後患尋甸見尙得手岑毓英務將省防嚴密布置並將各路進剿事宜與劉嶽昭會商迅殄賊氛唐友耕所部川軍計早由東川

一帶南下著該督撫等催令星速前進與滇軍聯絡聲勢將省城東路賊匪節節掃蕩毋任蔓延尋旬接仗出力各員弁著暫行存記俟克復城池再行請獎其傷亡弁勇一併彙案請卹將此由六百里各諭令知之○允吏部議軍務肅清省分丁憂人員俱令補行守制佐雜所得功牌概行繳銷○乙巳諭內閣前因吏治亟須講求令各直省督撫擇循聲素著者臚列政績送部引見雖量才拔擢恐賢能之員尙未盡登薦剡仍著各直省督撫隨時察看據實具奏司道中有體用兼備者一併保奏用備任使儻衰庸不職隨時參劾該督撫等務當秉公不得徇一己之愛憎致舉錯未得其平以副朝廷整飭吏治至意○諭岑毓英奏提督督戰受傷等語雲南提督馬加龍前在小偏橋打仗受傷尙未痊愈復出城攻克羊神廟賊壘乘勝進攻江右館身中礮傷甚重實屬異常奮勇

著由內府發去如意拔毒散四料交岑毓英轉給該提督祇領以資調理○諭軍機大臣等岑毓英奏官軍肅清省東賊壘攻克楊林團山等處各摺片滇省東路賊匪盤踞於十里鋪等處經岑毓英派令李維述等分路進攻先將蕭家山賊柵焚燒賊向省北馬村一帶狂奔自十里鋪小偏橋至長坡六十餘里賊壘一律掃蕩其楊林團山等處踞匪復經岑毓英等乘勝剿擊斬馘甚多楊林富民全境肅清見已分兵進取並規復澂江卽著岑毓英激勵在事將士奮力前進將各路賊匪痛加剿洗以靖賊氛並著會同馬如龍將南門外餘匪迅圖殲滅用固省垣馬侍德一股該撫務飭楊國發等相機堵剿毋任上竄致滋延蔓據稱署提督馬如龍中礮子傷甚重覽奏深爲廕繫該提督平時打仗既能身先士卒其籌畫省防事宜亦極周密前已加恩將其補授雲南提督本日並

由內府發去如意拔毒散四料以示體恤岑毓英於接奉此旨後
即將藥料齎交該提督祇領仍屬令安心調理俾得早日就痊省
城防守緊要馬如龍見已受傷岑毓英一人力難撐拄昨據劉嶽
昭奏進剿尋甸賊匪攻克要隘並回目均畏懼求撫是尋甸一路
即可蒞事該督當審度情形飭令全祖凱等帶兵攻剿一面馳回
省城與岑毓英和衷商辦以重根本毋得藉詞遷延是爲至要將
此由六百里各諭令知之○已酉諭軍機大臣等前因福濟等奏
土爾扈特汗布彥鄂勒哲依圖因遊牧被擾懇請暫赴京城當差
當經諭令理藩院議奏茲據該衙門奏稱該汗如暫行來京當差
不日新疆平定由京回牧往返辛勞似不足以示體恤請飭福濟
等暫爲安插等語布彥鄂勒哲依圖因回逆擾害不能同住遊牧
固係實情惟左宗棠見已督兵入隴以次蕩平甘匪進定新疆各

蒙古人等自可回牧有期該汗若復來京當差日後由京回牧長途跋涉往返徒勞轉非朝廷撫綏藩服之意卽著福濟榮全錦丕勒多爾濟錫綸傳知該汗此時毋庸來京並於烏里雅蘇臺所屬附近地方擇一妥善之區將該汗並隨帶官兵三十七員名暫行安插一俟新疆底定卽令該汗就近回牧較爲省便所有該汗應領俸銀仍著由京城支領將此由四百里各諭令知之○諭劉嶽昭等整飭雲南吏治○辛亥諭軍機大臣等崇實吳棠奏川軍援滇會克尋甸州城一摺前據劉嶽昭奏官軍疊克要隘尋甸逆匪畏懼求撫惟回逆變詐多端遽許就撫恐墮詭計仍飭在事員弁併力攻剿等語此次崇實等所奏會克州城情形係由回匪開門納款是否畏懾軍威真心悔罪抑係暫圖免死飢附飽颺劉嶽昭務當督飭各營嚴密防範不可稍涉大意一切撫綏事宜著飭道

員彭瑞毓等妥爲籌辦以期永久尋旬得手則嵩明白當迎刃而解省城亦可解圍著岑毓英激勵將士乘屢勝之威與劉嶽昭暨川省援滇各軍聯絡聲勢迅掃逆氛以靖邊徼崇實吳棠另片奏鮑超病已就痊惟精力尙未復元籲懇稍假休息等語鮑超病體痊愈可爲國家宣力深慰廑念伊見由省城回籍休息諒一兩月後必可調理復元著崇實吳棠傳知該提督卽行來京陛見將此由五百里各諭令知之○諭蘇鳳文馮子材奏進兵越南剿賊疊勝一摺逆匪吳亞終由越南回竄粵西邊境經官軍擊退遁歸巢穴蘇鳳文馮子材分飭各師由太平歸順取道進剿疊挫兇鋒連破那排枯株凌淦大嶺等匪巢收復村寨數十處正當乘此聲勢迅殄逆氛著蘇鳳文等飭令謝繼貴等乘勝進兵迅將通檣木馬等處賊寨一律蕩平盡殲醜類並隨時知照夷兵一體堵擊免致

該逆竄逃蘇鳳文另摺奏進剿黔省苗匪老巢等語貴州荔波九
阡里苗匪時出侵擾粵邊大爲地方之患見在孔憲隆等軍所向
克捷已攻破該匪卡寨多處直逼九阡老巢剿辦尙爲得手仍著
蘇鳳文檄飭該員等迅拔九阡苗寨埽穴擒渠以靖邊圉並偵探
清江苗逆嚴加防範毋令彼此勾結是爲至要將此由五百里各
諭令知之○追予三世殉難江西九江鎮總兵官馬濟美祖千總
立成父雲騎尉文雄戰功事蹟附入國史館馬濟美列傳並予建
祠○飭山西撥銀十萬兩解陝西充餉○壬子派總理各國事務
衙門大臣兵部尙書董恂三口通商大臣兵部左侍郎崇厚辦理
奧斯馬加國換約事宜○癸丑子雲南陣亡副將沈可堂江蘇陣
亡訓導張璵等祭葬世職○甲寅永定河溢○予故河南歸德鎮
總兵官朱南桂建祠○乙卯諭軍機大臣等棍噶扎勒參奏籌辦

開導叛民並給發索倫兵丁銀兩暨喇嘛困苦懇請撥給餉銀各摺片布倫托海叛民經明瑤等派人開導雖屢次詭詞乞撫而滋擾如故哈薩克遊牧地方亦頻受其害自應認真勦辦惟棍噶扎勒參將新到索倫官兵與舊有各兵合成一營統帶起程前往額爾奇斯河立營開導叛賊是否妥協著福濟榮全錦丕勒多爾濟錫綸酌度情形熟商具奏並一面知照棍噶扎勒參聽候辦理叛賊有東竄科布多之信並著奎昌明瑤隨時偵探嚴密防範不可稍涉大意十蘇木喇嘛情形困苦從前援應塔城那墊軍物價銀自應籌款給還著福濟於解到新疆餉銀內陸續撥給以示體恤將此由六百里各諭令知之○命查貴州被兵地方蠲緩錢糧○戊午諭軍機大臣等劉典奏覆陳安撫難民開墾荒地暨邊防布置情形一摺涇陽咸陽境內安插難民六千餘人鄜州等處安插

趙彰等股難民經劉典派員經理散賑墾荒均臻安靜其董福祥等股人數更多亦皆志切營生不至復聚爲匪卽著該署撫督飭委員實力奉行不得始勤終怠至渭北招墾事宜漸有規模惟涇陽三原高陵地高土燥非興修水利不足以資灌溉劉典擬將龍洞渠籌款開濬務當妥爲經畫俾竟厥功北山一帶地瘠民貧見雖匪黨殄除亟須豈弟宜人之吏安輯撫綏劉典所請因地擇人暫弗拘以成例之處著准其權宜辦理陝省西北與甘境毗連業經左宗棠分派各軍扼要布置甘省回匪自不至有回竄之虞該署撫尤當督飭陝軍聯絡聲勢隨時嚴密堵剿以重邊防將此由四百里諭令知之○諭劉崑奏截擊竄苗獲勝力保鎮遠施秉兩城一摺湖南援黔官兵自黃飄失利後苗匪張臭迷等膽敢率黨四出擾及巴冶冰溪巫包平下一帶牽掣兵力疊經官軍擊敗猶

復分股竄入龍腳屯等處滋擾後路大股竄踞彙米頭計圖一逞
經席寶田督軍兩路齊進先攻彙米賊巢斃賊甚眾乘勝逐北敗
賊奔竄回巢道員戈鑑等亦於遠口等處斬馘賊匪無數後路一
律肅清其分撲施秉鎮遠之賊又經提督彭芝亮等相機防剿疊
挫兇鋒踞平草塘關田壩等處賊壘軍聲頗振正宜乘此聲威激
勵各營探蹤進剿惟士卒久勞漸生疾病屢念殊深劉崐尤宜加
意拊循隨時策勵以期早定黔疆席寶田暫回沅州養病著傳知
該員安心調理營中事務仍著就近妥爲照料以資得力將此由
四百里諭令知之○予貴州黃飄寨陣亡提督榮維善祭葬世職
加等謚忠壯追贈三代暨本身一品封典於立功死事地方暨原
籍建祠總兵官羅志宏等祭葬世職加等附祀榮維善祠○廣廣
東羅定東安西甯三州縣學額各二名○己未諭內閣近來分部

人員較多著各室官認真考察如材難造就不得一概奏畱至京
察之期尤宜分別優劣不得有舉無劾俸滿截取之員當察其才
具分別繁簡保送並於候補人員隨時稽察使有所勸懲咸知講
求公事○辛酉諭內閣醇親王等奏武英殿不戒於火查明大概
情形各一摺本月二十日夜間西華門內武英殿不戒於火延燒
至三十餘間雖經該管各員會同步軍統領督率兵役趕緊撲滅
將西配殿及附近各處設法保護究屬疏於覺察所有管理武英
殿事務孚郡王惠郡王奕詳明善均著交該衙門嚴加議處該處
司員著先行交部嚴加議處仍聽候傳質其是日值班之披甲人
等於禁城近地並不小心看守卽著交慎刑司嚴行審訊至該處
素日看守官役人等有無別項情弊並著慎刑司一併審明究辦
尋吏部等衙門議上得旨孚郡王奕詳明善均著降二級畱任准

其抵銷員外郎延齡副內管領景秀郎中恩林松琬均著降二級調用再罰俸一年不准抵銷○調董恂爲戶部尚書鄭敦謹爲兵部尚書以毛昶熙爲工部尚書沈桂芬爲左都御史轉胡肇智爲吏部左侍郎調龐鍾璐爲吏部右侍郎轉潘祖蔭爲戶部左侍郎以李鴻藻爲戶部右侍郎候補侍郎○壬戌以武英殿救火出力王大臣等得旨嘉獎予軍機章京增壽等九百二十四員加級並賞兵丁銀○予湖北陣亡知縣姚國振原籍建祠○癸亥諭內閣倭仁徐桐翁同龢疏請勤修聖德以弭災變一摺方今陝甘雲貴軍務未平各省民氣未復餉需支絀物力艱難朝廷宵旰焦勞惟恐政事或有闕失茲者武英殿災上天示警儆惕倍深所有宮廷一切工程應用物件除必不可緩及例應備辦外一概停止政事或有未當著在廷臣工直言無隱○諭軍機大臣等穆圖善奏甘

省北路賊情並收撫高臺等處潰勇各等語據稱自中衛至靈州一帶賊勢蔓延甘省南路各軍未能兼顧請飭左宗棠金順派兵夾擊所奏自係爲力顧東北起見前據左宗棠奏檄飭劉松山軍向花定前進截剿甯靈之賊當諭該大臣酌派郭寶昌合軍齊進此時甘省北路賊蹤分竄自應乘其喘息未定之際痛加剿洗著左宗棠飛飭劉松山等迅速進兵毋稍延緩金順見在行抵何處並著仍遵前旨酌量情形統率所部聯絡張曜宋慶兩軍扼要防剿使匪蹤不得東竄藉爲包蔭屏蔽左宗棠計已行抵涇州該處距蘭州尙遠見在北路賊勢固屬喫緊而南路河狄之賊密邇省城亦須兼顧刻下陝省邊境既經防軍分布當無後顧之虞左宗棠接篆後自宜移軍前進或赴秦州一帶擇要駐紮以便居中調度該大臣鄭重進兵固是老成之見惟省垣重地關繫甘省全局

左宗棠身任封圻責無旁貸總當力籌保衛儻或稍存大意致有疏虞必惟左宗棠是問穆圖善交卸督篆後卽著暫駐蘭州聽候諭旨其省城防守及河狄一帶防剿事宜仍當竭力籌辦不得以接統有人稍涉諉卸肅州鎮總兵黃金山傷疾舉發著賞假三箇月回籍調理並免其開缺一俟病痊仍令迅速赴營以資得力高臺山丹潰勇穆圖善已派王仁和招集統帶著左宗棠穆圖善飭令認真訓練以資攻剿儻再不遵鈐束卽行從嚴懲辦所需糧餉並著隨時接濟穆圖善原片著鈔給左宗棠閱看其范銘所部勇丁因餉缺搶掠並著責令該員嚴行查辦妥爲綏輯左宗棠旣經入甘於甘省各軍應如何分撥糧餉及酌量調派之處著悉心籌畫奏明辦理務使各軍協力同心不至各存意見方能所向有功穆圖善另片奏接准兵部咨文據實覆陳等語赦天印一員著仍

遵前旨俟軍務稍鬆解赴河南訊辦富勒渾已簡放歸化城副都
統見在如可離營著金順知照該副都統卽赴新任暫緩來京陛
見其所部兵丁著金順會同定安另行派員統帶將此由六百里
各諭令知之○甲子署陝甘總督穆圖善奏秦州峽門等處有賊
奔竄見飛飭提督梅開泰等相機夾擊得旨省南多完善之區著
嚴飭該提督等分路夾擊務淨賊蹤毋徒以驅逐爲能任其紛擾
○乙丑諭內閣吳坤修奏請賞假回籍補行育孝等語吳坤修前
在軍營兩次丁憂均未能在籍終制自應俯如所請吳坤修著俟
英翰到任後賞假百日回籍育孝假滿後卽行來京陛見○諭軍
機大臣等鄭敦謹奏遣撤楚勇籌辦河防暨張曜在蒙地擊賊獲
勝文麟奏請飭催山西欠餉各摺片晉省沿河要隘近接陝疆甘
回見尙未平河防仍須籌辦鄭敦謹所陳河保等處責成總兵馬

陞督防興臨以下責成總兵王巨孝督防甯鄉石樓以下永濟以上責成署臬司李慶翱督防卽著該署撫於李宗義抵任日彼此籌商務臻嚴密陳提所部楚勇除酌畱礮船水勇外其餘勇丁仍著飭令該革員迅帶起程毋任在晉逗畱滋事該省河防地段綿長見在楚勇既撤兵力尙單自應添募可靠勇丁分段填紮李宗義抵晉後著卽督同李慶翱妥籌辦理總期兵歸實用餉不虛糜該撫身荷厚恩於該省吏治民生及籌防籌餉各事宜務當斟酌盡善以副委任山西協濟哈密餉銀欠解甚多文麟見抵哈城支發勇糧各件需用浩繁著鄭敦謹李宗義卽飭該藩司迅將前項欠解哈密餉銀無論何款先行籌撥銀六萬兩交文麟前派迎餉委員吉恆趙德鈺等承領管解赴哈毋得藉詞延誤致誤急需金順奏請將典押部照之委員懲辦並請飭山西巡撫檄屬查鈔等

語候選州同劉標經金順派赴山西催餉將帶往之部頒空白領支等項執照率行典押實屬膽大妄爲已將該員先行革職交金順嚴加審辦矣該員係前任山西長子縣劉世安之子見寓居潞安府地方難保無寄頓隱匿情事著鄭敦謹李宗義迅飭該地方官密將劉世安寓所財物先行查封備抵以重款項將此由五百里各諭令知之○諭金順奏見籌督兵渡河西進一摺陝回大股麇集甯屬黃河兩岸西岸自石觜山至中衛賊氛尤熾該署將軍以所帶十數營合張曜所帶六營兵力尙單未能徑由烏喇磴口直取石觜山壓剿而南著卽與定安妥商體察情形酌撥隊伍西進該署將軍趕緊籌備行糧卽行督兵進發毋稍延緩富勒琿昨已簡放歸化城副都統著金順仍遵前旨如見在可以離營卽知照前赴新任暫緩來京陛見所部兵丁由金順會同定安遴員統

帶另片奏請將勸捐延不回營之州同劉標懲辦等語劉標著卽革職交金順嚴行審訊按律定擬具奏將此由六百里各諭令知之○諭文麟奏接到回目投遞回文及委員烏仁泰等稟函見在籌辦情形並據軍機大臣等將回目妥得璘原文呈覽詳加披閱其情詞桀驁尙非真心歸順該回目探知大兵陸續出關恐被勦窮蹙先以官吏激變爲詞冀爲他日卹罪地步文麟旣見及此給與諭紙令其調集各城回目赴烏城曉諭以安其心所辦尙屬妥協但此中操縱機宜必當細心斟酌文麟所給妥得璘諭稟卽著鈔錄呈覽成祿計已出關著卽與文麟景廉往返籌商不可稍涉歧異致啟猜疑該回目所請調赴烏城之甯夏等處各回目其意不過欲探知口內虛實轉恐互相勾結甚非所宜著文麟等諭以屢奉明旨但分良莠不分漢回良善者撫之叛逆者勦之別無投

誠章程口內各回目亦不能令其出關並著左宗棠穆圖善曉諭口內受撫各回目革面洗心共安生業毋得心存觀望並著密飭各屬妥爲防範毋使與口外各回目勾結致剿辦更形棘手至委員烏仁泰等被該回目調赴烏城已否送回其情形若何索煥漳本有投誠之語見在有無動靜著文麟等隨時密探奏聞總之官吏激變將來固當查明嚴辦而各回目踞城變亂亦豈能置之不問僅能於大兵未到之先豫先反正尙可網開一面以遂其效順之心想該大臣等俱能深知此意也將此由六百里各諭令知之○丙寅諭內閣農桑爲衣食之原小民耕種勤惰不齊著各督撫責成地方官認真考課並訓迪士林勸置義塾以資觀感○諭軍機大臣等榮全奏會立牌博奎昌奏建立牌博情形各一摺榮全奎昌見與俄官分界遵照紅綫條約於博果蘇克壩塔斯啟勒山

分建界牌鄂博兩處辦理尙爲妥協其由珠魯淖爾至沙賓達巴哈分界處所原圖所載險阻難行俄官欲由珠魯淖爾迤北數十里唐努山之察布齊壩上建立鄂博由此直向西北至沙賓達巴哈按其地址已將唐努烏梁海游牧包去大半榮全惟當按照條約辯論妥爲籌辦以副委任奎昌見與俄官往立西邊牌博亦著詳細履勘照約辦理將此由六百里各諭令知之○諭張廷岳等奏圖謝圖汗等部落因哲布尊丹巴呼圖克圖圓寂援案赴藏熬茶請將銀兩解交戶部俟達喇嘛到藏後由駐藏大臣庫內發給等語所有此項銀五萬兩著張廷岳阿爾塔什達卽行派員解交戶部兌收此時西藏庫款未必有餘著崇實吳棠於川省應解京餉內提銀五萬兩迅卽派員解交恩麟收存俟該達喇嘛羅布桑伊什等到藏時卽由恩麟如數給發應用將此由四百里各諭

令知之○戊辰子江南陣亡從九品汪雲上等祭葬世職○己巳
諭軍機大臣等錫綸奏招撫變民未成見在相機改辦一摺布倫
托海變民經錫綸派民人侯裕喜等前往招撫攜帶變民一名行
至烏隴古河邊被哈薩克將其衣物搶劫其隨後邇來之賊目錫
吉爾渾又爲哈薩克所訐由呼圖克圖暫行鎖禁是該變民與哈
薩克彼此攘奪尙無轉機張愚等怙惡未悛此次所遞呈詞又無
悔罪輸誠之意錫綸見擬相機辦理並與棍噶扎勒參聯絡聲勢
以杜釁端自係正辦著卽會同福濟悉心籌商相機而行不必豫
存成見文碩不久抵任亦當與福濟錫綸和衷商榷毋誤事機前
據棍噶扎勒參奏請帶兵前往額爾奇斯河開導叛匪當諭福濟
等知照該呼圖克圖聽候辦理此事是否妥協仍著該將軍等統
籌全局熟商具奏萬不可遷就目前致貽後患將此由五百里各

諭令知之○諭恩麟奏籌辦三巖野番並廓夷情形一摺三巖野番屢次出巢搶劫大道幾致不通景紋僅以紙上空言搪塞屬吏其不達事理甚可痛憾恩麟既知景紋之謬派員勦捕卽著實力籌辦以期綏靖邊疆廓爾喀與唐古特既有猜嫌又因未遂其入貢之計與唐古特書信語多挾制亟應設法解釋毋任別啟釁端恩麟已派員前往撫諭並擬俟德泰到後借巡閱後藏之便前赴廓番交界親自禁約所辦甚是但該大臣務當不露聲色於開誠布公之中仍不失統馭外夷之意方爲得體並著於巡閱後將詳細情形確探具奏以慰廑繫將此由五百里諭令知之○庚午以孟秋時享太廟上前期親詣行禮○諭軍機大臣等理藩院奏據阿拉善扎薩克親王貢桑珠爾默特呈稱逆回擾害旗境請發兵救援等語陝西董志原回匪竄至中衛分股三路直撲阿拉

善旗境之定遠營貢桑珠爾默特派兵迎敵傷亡兵丁百餘名長
吏疊立各爾大賴等陣亡該逆率黨七八千圍困定遠營城並將
城外寺院房屋焚燒搶掠街市貢桑珠爾默特祖塋及西園府第
亦被焚毀西路臺站不通逆回尙盤踞該旗南界阿拉善旗蒙兵
無多不敷防守待援甚迫亟須撥兵前往迅殄逆氛左宗棠已派
各軍分道入甘穆圖善見在蘭垣金順由烏喇西進靈甯一帶匪
眾狃徇蒙古被其蹂躪應如何籌撥勁旅迅速救援著該大臣等
妥籌兼顧杜嘎爾熟悉甯夏回情該副都統等是否尙在托城如
可移兵西向卽著統帶所部馳赴阿拉善一帶協剿或就近另撥
得力隊伍前往救應均著定安金順斟酌情形妥爲籌辦至貢桑
珠爾默特守城擊賊甚爲出力乃祖塋府第均毀於賊旗屬大遭
擾害朝廷實深厯念著理藩院傳知該親王將該旗被擾地方加

意撫恤不日大兵厚集即可痛加剷洗掃蕩妖氛該旗歷次籌墊
臺費銀五萬餘兩卽著戶部由附近省分迅速指款撥還原摺均
著鈔給閱看將此由六百里諭知左宗棠穆圖善定安金順並傳
諭理藩院知之○是月緩徵山西臨汾等五縣被擾歉收倉穀
秋七月辛未朔日食○諭軍機大臣等總理各國事務衙門奏洋
人在臺灣違禁滋事見籌辦理情形一摺洋人美利士等在臺灣
大南澳地方伐木墾荒私販軍火交通生番實屬違禁妄爲業經
該衙門照會英荷兩國使臣由中國自行拏辦並知照該督撫酌
覈辦理此事英國使臣已據照覆飭將英人名康撤回而荷國使
臣則請將美利士暫行停辦此時該洋人等曾否撤回抑仍在該
處招募工作如果不遵條約任性妄爲自應由該督撫查拏懲辦
惟事關中外交涉必須有明幹大員隨時斟酌辦理方臻妥協臺

灣道一缺關繫緊要未便久懸著英桂卞寶第迅速揀員奏補或
先擇人署理責成將洋人交涉事件察看情形妥慎籌辦總期不
激不隨毋稍偏倚原摺著鈔給閱看將此由四百里各諭令知之
○諭棍噶扎勒參奏叛民中變勢難開導一摺據稱叛民近踴哈
薩克遊牧與俄羅斯守卡之兵接仗傷有一二十人並與布倫托
海大臣偽篆印文一件不知內係何詞等語該叛民兇心未改復
與俄夷生事傷其守卡兵丁福濟文碩錫綸惟當懷遵前旨相機
妥籌辦法毋稍大意棍噶扎勒參以該叛民言詞狂妄不能開導
見在紫營克林河分其再竄之勢未敢擅行進剿著福濟等體察
情形知照該呼圖克圖遵辦其偽篆印文是否卽係前此所遞呈
詞並著文碩錫綸查明具奏棍噶扎勒參另片奏叛民與俄兵接
仗各情據逃出民人阿勒太聲稱在內目覩此事旣屬確實福濟

等不得遷就因循致生枝節原摺片均著鈔給閱看將此由五百里各諭令知之○癸酉諭軍機大臣等定安桂成奏回股後犯草地官軍截剿獲勝並請撥兵駐紮甯夏平羅一帶各摺片阿拉善旗之定遠營被回逆圍困甚急張曜會同烏爾圖那遜帶兵往援由蘭扇至察漢淖爾地方遇賊接仗擊斃悍賊甚多紅柳樹一帶伏賊亦經官軍擊敗其塔爾貝都貢地方回股復爲烏爾圖那遜所部衝散該逆等仍由舊路連夜西遁此次逆回糾合東竄疊經官軍擊敗剿辦尙爲得手卽著該將軍等迅飭張曜各軍乘此聲威覘賊所向會合剿除以期痛殲醜類所有在事出力將弁兵勇著准其擇尤彙案請獎見在蒙漢各民避居北山該處直隸包薩難保該逆不因邊內乏糧復行窺伺金順一軍前擬由烏喇西進該軍見已渡黃暫紮什巴爾台著仍遵疊次諭旨酌度情形與張

曜等聯絡聲勢分投堵剿定安等以左宗棠大軍進剿靈州賊匪
若鋌走草地張曜等追剿較遠請飭金順駐軍於甯夏平_緝一帶
或由左宗棠另撥一軍聯絡扼紮遏賊東竄北竄之路所籌不爲
無見金順追賊正緊所部亦不甚厚應否駐軍甯夏平羅著會同
定安等悉心商榷以免顧此失彼如金順實難兼顧卽著左宗棠
另撥一軍往彼駐紮肅清餘匪卽可專意西征該大臣不得以無
軍可撥致賊遂其乘虛之計牽掣我師刻下陝甘各回未必不齊
圖勾結穆圖善務當督飭將士將河狄各匪痛加剿洗以斷賊援
並隨時與左宗棠金順等彼此熟商俾諸軍聲息相通迅殄羣醜
杜嘎爾富勒琿等見抵何處仍著定安等隨時知照該副都統等
會合追剿用壯聲威將此由六百里各諭令知之○諭各直省籌
補常平倉穀○命吳坤修親赴沿江各屬撫恤被水災民○甲戌

諭軍機大臣等劉嶽昭奏分兵赴省會剿並援救普安屬城岑毓英奏收復嵩明州城及各路軍務得手情形暨軍功李鳳祥等剿賊出力各摺片滇省賊匪急則求撫緩則悖叛已成慣技岑毓英於此次收復嵩明州城後將詐降逆首李芳園卽行殲除並將匪黨晏洪等悉予誅戮辦理尙合機宜此時祿豐羅次之軍次第得手白鹽井又經攻克聲威已壯卽著岑毓英督飭各軍乘勝進剿迅速攻取祿豐安甯易門昆陽等處以期速解省圍所有收復嵩明州城及攻克白鹽井等處出力員弁著准其俟省圍解後彙案奏請獎勵軍功李鳳祥劉光瑛李珍國等於迤西各城全失之際乃能固守巖阿見又攻克龍陵廳實屬深明大義著岑毓英查明奏請優獎劉嶽昭見派總兵李家福等各率所部由曲靖赴省卽著飭令趕緊前進知照省垣各軍兩面夾擊迅奏肅清至貴州普

安城近接滇疆見在苗匪巖大五一股圍撲廳城該督派兵援救並飭知州文鴻盛嚴扼滇防杜其竄越東路自可無虞著於布置稍定卽赴省城與岑毓英和衷共濟會籌全局早靖巖疆將此由六百里各諭令知之○予雲南陣亡遊擊馬祥麟等祭葬世職○丙子申諭福濟等安插厄魯特人眾○丁丑予貴州殉難知縣湯澤長等祭葬世職○戊寅左宗棠奏竊維甘肅之患爲回匪爲土匪而皆由陝回之構禍而起查回民入居中國由來已久其人雜處諸夏舊本齊民其經典則專習天方別爲氣類雖新教老教有自相殘殺之時東彌西彌有互相猜忌之隙然至與漢民爭鬪則攘臂紛起彼此聯結一氣視若公仇其消息潛通迅如郵傳卽如陝回肇衅之初雲南回族卽豫逆謀有稱普洱阿洪者尙在賊中見爲戎首各省遇有調撥本地回民必先通消息俾陝回豫爲之

備至甘肅回民久相勾結卽業經就撫之靈州金積堡回馬朝清
卽馬化澂清水縣張家川回李德或以馬械糧食顯與市易嗾其
擾陝或以官軍聲勢浩大勸其暫就安撫相時而動皆以同教一
家隱相親附外雖貌爲恭順無異王民內則暗肆狡猾仍滋他族
至於西甯之馬朶三藉稱就撫挾持官吏而西甯漢回兵民各務
陰歸其掌握名爲官撫回實則回制官與滇回之包藏禍心如出
一轍尤勿論也回之黨堅交固如此陰謀詭計如此若概加剿辦
不特誅不勝誅亦慮未變種人反側不安致妨大局若廣示包荒
隨宜招納則賊心未死轉瞬兵撤匪起實在意中甘肅所辦撫局
卽前車之鑒也陝回敗竄甘肅之後散布黑城子豫望同心各回
堡地與金積堡相近有遞呈求撫者有投附河州回巢者有由中
衛渡河東竄旋卽敗回者互相猜疑不復如前此之固結甘回恐

官軍進剿勢將波及有豫先自陳實爲夏回者有因陝回侵掠閉
拒不納者馬化澂亦上稟代陝回求撫臣仍以前年分別勦撫之
諭示之生死禍福聽其自擇蓋欲申明神武不殺之德與怙惡
必誅之威以期久遠也劉松山一軍由清澗以指定邊花馬池臣
飭其先辦三月軍糧節節遞運然後前進到花馬池後小作停頓
察看馬化澂撫局及陝回離合蹤迹再定進止其金順張曜之軍
則已向磴口進發矣道員魏光燾進屯安化縣板橋及慶陽府城
提督劉端冕分屯合水縣總兵張福齊進屯甯州以西提督丁賢
發進屯正甯周蘭亭駐蕭金鎮互相聯絡就近屯壘以利秦隴關
鍵撫災黎而裕軍食臣駐軍涇州瓦雲驛地居慶陽汧隴之中足
資控制策應檄雷正綰黃鼎兩軍漸進平涼固原以勦北路散踞
逆回與南路之師遙相映帶峙餉糧勤屯壘禁擾累戒妄殺仍懷

道論旨祇分良匪不分漢回爲久遠之規制賊之本盡瘁圖之不敢玩寇以誤戎機亦不敢求速而忘至計也自回氛四起官軍不能制賊民間堡寨有被回逆攻破無家可歸流而爲匪者有因官軍誅求無厭無所控訴激而爲匪者如已撫之董幅祥扈彰等見求撫之靜甯州張貴卽剛八鎮原之孫百萬等指不勝屈官軍因急於撫回遇有成股土匪每以翎頂優之示籠絡而安反側若輩則糾聚黨夥妄立營名自刻木印私製旗幟居然以統領營官自命徵糧民間藉肆剽掠無業之民趨之若鶩似兵非兵似勇非勇似匪非匪似團非團泯泯棼棼徒爲民害見聞臣軍度隴有赴各軍投效者有請助戰者臣擬挑其桀黠者束以營制餘均勒令歸農給以賑糧籽種收其馬械令各安生業毋相侵暴否則誅之此擬治逆回治土匪之大略也至甘肅兵事之壞由於餉太絀而營

太多不擇將而廣募勇將領又勢力相傾各不相下任意進止無所掣承其勇數有一營僅止二三百名仍領五百名之糧每營每日派糧八百斤而以一半折取糧價兵勇數日食且猶不足將領之辦公薪水則惟務取贏故勇額日有逃亡而將領則鮮有乞退者亦有名雖一營而數多至一倍兩倍者如范銘所帶之勇十二營而人數實多至一萬數千則一人充勇一家隨之坐食與客軍之虛額相反而虛糜則同也故不能戰而亦不能守臣與穆圖善未嘗謀面而以所聞所見言之似愛克厥威在所不免諸將非惟不知感激方且狎之穆圖善非惟不加裁抑方且柔之隴事所以難於整理也臣雖渥叨恩命謬領戎行而未接督篆以前事權不一臣於諸將苟令有不行卽於穆圖善愛莫能助在乾州時曾恭錄諭旨咨會穆圖善行抵涇州接受督篆尙未接准穆圖善咨覆

所有兵事餉事一切自未便輕率置議又奏竊甘肅全境回土各匪蠡屯蟻聚撮其大要北則甯夏靈州南則河州狄道西則西甯而固原平涼介居東路之中爲進兵衝要以機宜論固宜注意中權而以時勢言之必先疏通南路蓋用兵以固餉源爲先布陣以防後路爲急理固不易也甘肅餉源見恃秦州一綫轉輸而此次河州逆回專以斷官軍餉道爲主秦州西通河狄東連鳳寶北倚平涇南枕階文爲度隴間道如不早圖則蘭州旣成孤注難以圖存而河狄之回與陝西勾結爲奸兇燄又將復熾此穆圖善所以請增調南路之軍而微臣所以檄諸軍先指秦州也五月十四日漢中鎮總兵記名提督李輝武時駐寶雞詞河州逆賊馬步六七千人自成縣竄陷兩當立飭所部分駐鳳縣方石鋪營官望名滔王照南率兩營迎勦自率大隊繼之旋以另股由隴州火燒寨竄

齊家莊恐其窺伺汧寶遂派營官胡國珍楊恩澤馳赴兩當會同王名滔王照南進剿而自率四營留寶雞以待王名滔等倍道赴援約鳳縣知縣郭建本帶團丁堵馬嶺關以防分竄十六日王名滔等抵楊家店適該逆五六百騎繼擁突至王名滔王照南嚴陣卻之胡國珍楊恩澤兩營馳至遂會商共擣賊壘胡國珍由左楊恩澤由右王名滔王照南由中三路並進賊悉眾抗拒相持者久之王照南躍馬陷陣連斃數賊賊勢稍卻忽一賊目執黃旗嗾悍黨數百斜出力堵諸賊仍回旗衝撲胡國珍急率所部從賊後殺入矛傷黃旗賊目墜馬斬其首以徇自己至西廩戰數時賊屍枕藉餘黨潰圍向徽縣竄走官軍追殺二十餘里至韓家灣是夜駐兩當縣城次日偵賊遠遁乃收隊回防是日約殺賊近千名救出難民三百餘名訊據生擒回逆供稱此股回逆約三千有奇由河

州竄徽城轉竄兩當賊目是僞元帥馬阿渾馬海臣兩人陣斬黃

旗賊目卽馬海臣也訊畢斬之方賊偪兩當時

臣

慮李輝武兵力

尙單檄畱陝補用道李耀南候選道湯聘珍員外郎銜中書吳士

邁由汧隴分出清水寶雞向秦州助剿未到之前另股回逆又由

馬龍陂竄至清水縣之唐藏張家莊等處李輝武飭王名滔畱四

成隊守營以六成隊裹糧馳剿飭前駐鳳縣各營截其南竄二十

二日王名滔等抵唐藏訶賊踞張家莊距唐藏十五里楊恩澤率

所部趨山右拊其背王照南率所部從山左上攻王名滔胡國珍

各率所部伏於山坳王照南先與賊遇引軍佯退賊欺其怯傾巢

擁出王照南且戰且走退至山坳伏軍突起夾擊賊覺中計惶懼

潰退官軍三面蹙之自相踏藉死者纍纍官軍蹣跚追剿越唐藏

四十餘里之餘步關沿途賊屍徧野餘賊向吳家河一帶竄去官

軍收隊翌日仍還原營是役計斃賊六七百名救出難民百餘名
生擒回逆訊供此股係藍陳兩偽帥所帶陳逆名民市已中洋槍
斃矣李輝武一軍先後剿兩當縣回匪收復縣城剿唐藏回匪獲
勝及陣斬賊目之實在情形也二十六日華亭縣回逆零股周永
龍率千餘人竄向秦州屬之隴城駛至百花川一帶肆行焚掠時
李耀南湯聘珍方自寶雞指秦州該逆聞官軍將至折而北竄渡
渭援及赤沙香泉等處李輝武旋飭所部出車轍鎮以達香泉自
率隊繞趨赤沙該逆又聞風竄隴州南路石莊子去矣隴州防軍
陝西候補知府喻步達聞賊至石莊子立派所部總兵蕭羣魁參
將龔曉亭率隊出大栗樹剿之副將喻光彪率隊出咸宜關以截
撤家店去路均冒雨前進詎該匪已由石莊竄過撤家店比六月
初一日蕭羣魁龔曉亭至石莊則賊已狂奔而過比喻光彪由撤

家店橫出截之僅斬尾賊二十餘名救出難民五十餘名而已五月二十六日員外郎銜中書吳士邁率所部六營由隴州故關行抵清水擬徑赴秦州中途接士民呈訴秦安所轄隴城鎮有回逆大股竄踞馬步紛沓四出剽掠焚毀甚慘吳士邁立飭各營次日馳勦清水距隴州八十里二十八日辰刻始至沿途紳民訴河州逆回僞元帥周瑞卽周七上年帶賊千餘人來隴城擄糧攻破康平堡卽踞爲巢穴所擄財物悉運河州而就撫回目李德昌夥黨所稱南八營者陽投誠而陰助逆請速進勦以拯殘黎吳士邁詢悉康坪堡距隴城尙七十里險據山腰東有馬家寨西有龍山寨南有馬家河皆南八營回民所居之堡當催鄉導親率兩營由高山進派四營及馬隊由平川進直搗康坪堡該逆憑險設卡四用劈山礮仰攻弗克又無別徑可繞百長羅如松游石懷憤甚率

敢死士肉薄而上悉被叉子槍擊退再前再卻壯士死者十二人
羅如松等益憤仍裹創猛撲前者甫顛後者繼進破卡而入刺死
悍賊多名賊始卻退官軍方整隊深入忽續到黃巾賊目執黃旗
揮馬步大股衝來勢甚兇猛官軍列方陣待之賊四次衝突官軍
屹如山立不動少頃吳士邁見賊氣漸衰急揮各營如牆而進槍
礮止刀矛接斃賊約數百名而執旗賊目仍死拒不退壯士胡高
紳等乘閒擎綫槍測準轟之墜馬餘賊大潰望康平堡而奔吳士
邁急揮兩營踰山脊截之賊狂奔不止墜崖受創死者什九堡內
賊約數百見馬賊大敗亦遂齊出將棄堡而逃官軍截令入堡以
開花礮轟之復派馬隊飛追逃賊逾十里又斃賊五百餘名而堡
內賊被創已甚夜分突逸官軍急起截之賊分竄龍山寨馬家寨
負嵎不出生擒十三名奪獲戰馬五十五匹紅黃旗二十九面日

暮收隊訊據生賊供河州回民三十六村偽總帥穆阿渾派周瑞
卽周七十爲元帥帶千餘人踞康坪堡方擬收割二麥聞秦軍將
到又加派馬步賊前來陣前轟斃執黃旗之賊卽偽帥周瑞也當
將十三賊正法毀平康坪堡並出示陽撫陰叛之龍山馬家山兩
寨諭知回目李德昌破其暗相勾結之奸臣前因李德昌於董志
原回巢蕩平遞稟自陳哀祈免剿因摘該回目上年通陝回書中
密語示之諭以禍福至是勒其縛獻河州逆回以定其志此喻步
蓮追殺華亭零股與吳士邁痛剿秦安康坪堡逆回克獲全勝掃
蕩巢穴之實在情形也臣維甘肅逆回頻年擾攘千里蕭條不獨
漢民被其傷夷卽良回亦遭其荼毒甘之南路惟秦州一帶被禍
略輕陝之西路惟鳳寶兩縣較爲完善河州回匪之垂涎於此者
一則肆其剽掠一則繞出甘肅各軍之前截其餉道俾不戰自潰

也有此數捷庶可破驕賊之膽而樹度隴先聲吳士邁李耀南湯

聘珍等見均馳抵秦州

臣

復調提督馬德順馬步全軍駐隴州李

輝武仍駐寶鳳節節蒐薙會商防期期漸清隴境以通餉源庶於

大局有濟

上諭軍機大臣等河州逆回自成縣竄陷兩當經李

輝武等進剿收復縣城並將清水縣唐藏回匪擊敗吳士邁一軍

復將秦安康坪堡回巢攻破剿辦尙屬得手所有此次尤爲出力

員弁勇丁著准其擇尤彙案保奏陝回散布黑城子預望同心各

堡互相猜疑甘回亦畏懼求撫惟回情狡詐反覆無常左宗棠務

當酌度情形分別剿撫以期一勞永逸劉松山一軍到花馬池後

卽飭相機前進毋稍延緩郭寶昌軍見紮何處應否與劉松山合

隊西行以資厚集著該大臣酌量調遣毋置諸無用之地董志原

竄回紛擾邊外及阿拉善旗境著遵奉疊次諭旨派兵兜剿並飭

雷正綰黃鼎兩軍迅由平涼固原合剿北路逆回兼爲南路聲援左宗棠見已行抵涇州著穆圖善卽遵前旨將關防派員送交左宗棠接收前經諭令左宗棠接篆後或前赴秦州一帶擇要駐紮本日左宗棠亦奏稱甘肅餉源恃秦州一綫轉輸河州逆回專以斷官軍餉道爲主是秦州關繫尤爲緊要該大臣駐軍涇州恐尙不足以資控制著仍遵前旨酌量移軍總期力保完善兼衛省垣不得顧此失彼甘省餉絀營多左宗棠接篆後卽當妥爲籌畫竭力整頓務使兵歸實用餉不虛糜以維大局將此由六百里各諭令知之○辛巳諭軍機大臣等穆圖善奏甘省地方情形及回逆竄擾阿拉善旗地請撥兵援剿定安奏回逆圍攻定遠營派兵進援各摺片甘省逆回北路則由甯靈竄出邊外冀得掠食南路則肆擾秦州圖絕官軍進糧之路其計甚爲兇狡惟劉松山向花馬

池進發截剿甯靈竄匪而秦州爲轉輸要道關繫非輕著左宗棠
仍遵疊次諭旨移軍進駐秦州接受督篆以期力扼要區兼衛蘭
州省垣不得以屯田爲詞株守一隅穆圖善卽遵前旨派員將總
督關防送交左宗棠接受以專責成左宗棠身爲統帥兼任封圻
接篆以後軍務及地方各事宜俱屬責無旁貸著卽悉心經理妥
爲布置如有疏虞惟該大臣是問穆圖善交卸督篆著仍以將軍
督率在省兵勇力圖保衛其河州股匪仍當隨時撥兵堵剿該將
軍所部兵勇若干糧餉應用若干卽咨明左宗棠應如何部署裁
併之處卽由該大臣妥籌辦理左宗棠穆圖善同辦一事務當和
衷商酌以顧大局不得各存意見逆回竄擾阿拉善旗地方該親
王祖瑩府第均被焚毀前據理藩院奏聞諭令定安等撥兵籌剿
見在定遠營尙未解圍定安飭令楊春祥帶隊進剿兵力尙單金

順行抵達拉特旗什巴爾台地方酌量情形仍遵前旨或撥兵協
剿或直抵平羅卽與定安商酌剿辦張曜見在進駐纏金沙金托
海其後隊到齊後仍著定安催令前進立解重圍本日據李鶴年
奏宋慶患病請給假兩月調理該軍事務委提督蔣東才劉廷照
料已批令在營調理蔣東才等能否得力並著定安隨時察看妥
爲兼顧定安所錄回匪王登明供詞察其情形與左宗棠等歷次
所奏回逆求撫各情相符著鈔給該大臣閱看斟酌辦理將此由
六百里各諭令知之○甲申諭軍機大臣等蘇鳳文馮子材奏官
軍克復越南九葑等屯埽平賊壘見督軍進剿一摺逆匪吳亞終
率黨竄入越南蔓延通攜文淵洛陽等處經該撫等飭令總兵謝
繼貴統帶所部會合副將劉玉成等分投進剿殲賊甚多並將賊
壘燒毀二十餘座克復通攜謝繼貴遂取道高村等處進規木馬

副將吳天興一軍由板錫乘勝前進攻克板在村其文淵匪眾又經都司陳朝綱擄平賊黨由驅贏來援者官軍約同降勇夷兵渡河夾攻賊勢披靡餘匪奪路而逸該逆復下竄龍州馮子材令劉玉成等軍取道彬橋疊奪賊壘由那錦橫坡等處分路圍攻將九葑洛陽各屯次第克復該匪退守木馬蘇鳳文等見以賊勢漸蹙督軍進攻並札諒平各路夷官堵截潰匪著卽督飭劉玉成等馳往木馬等處迅速分攻毋任該逆得以喘息吳亞終於窮敗之餘竄走越南邊地何難一鼓蕩平乃臨以全省兵力經年累月尙未歲功實屬不成事體見進勦各軍該撫等責成何人辦理其得力員弁係屬何人難免無關葺畏蒞之人濫廁行列均著逐一查明據實具奏蘇鳳文等務當振刷精神力除積習迅將此股賊匪盡數殲滅綏靖藩封毋得觀望遷延致干咎戾道員李均前有人奏

參把持軍需侵蝕公項各款當交蘇鳳文按照所參確查覆奏茲
據該撫奏稱李均在途患病委員接護越南陪臣回越等語該道
員被參各節仍著該撫遵奉前旨徹底查辦不准稍涉含胡並著
催令該員趕緊回粵毋許託病逗留將此由五百里各諭令知之
○予廣西陣亡參將鄭魚祭葬世職○乙酉諭軍機大臣等錫綸
奏擬買糧賑恤厄魯特人眾並擊敗變民各摺片厄魯特人眾散
處阿勒台烏梁海土爾扈特扎哈沁等部落者已數千人其流寓
科城附近地方亦百餘家近因迫於飢寒肆行劫盜與各部落已
有仇隙錫綸擬在科城採買糧石散放賑濟自係權宜之計即著
照所請將部撥餉銀提用三千兩就近在科城採買口糧數百石
以資賑濟該人眾流離失業情亦可憫文碩錫綸務須妥爲撫恤
儻餉銀有不足之處仍准其隨時請撥福濟所辦喀爾喀分安各

事宜已有成效文碩錫綸卽按照該將軍等所擬分安人數按名散放口糧一面收集一面卽分撥各該地方安插以期早弭釁端此時庫倫東兩盟分領人數文冊已否咨到著福濟榮全錦丕勒多爾濟文碩錫綸迅速咨商辦理毋稍延緩棍噶扎勒參帶兵赴霍博克賽里地方適變民張懸率眾西擾經該呼圖克圖會合該處蒙兵攻擊斬獲甚多張懸中傷逃遁著福濟等仍遵前旨相機籌畫傳知該呼圖克圖遵照辦理將此由五百里諭令知之○丙戌諭軍機大臣等禮部奏接到朝鮮國王咨文以鴨江之北鳳城之外游民蓋屋墾田請嚴行禁止據情轉奏一摺奉天邊外游民私聚聚眾日繁前經延煦等前往查勘酌擬章程呈覽內有推展邊界及嚴定邊禁各節疊經諭令都興阿等悉心籌畫酌覈辦理此事關係中外邊疆若不及早經理漫無限制恐該游民等任意

侵越漸及朝鮮柵路致該國居民不無疑慮殊非朝廷綏輯藩封之意著都興阿額勒和布恩錫懷遵前旨迅速籌辦並將如何辦理情形據實具奏毋得畏難苟安稍存膜視並著禮部查照向章行知朝鮮國王慎守邊境如有游民私越滋擾情事卽行照例懲辦禮部原摺並朝鮮國王咨文著鈔給都興阿等閱看將此諭知禮部並諭令都興阿額勒和布恩錫知之○裁外城練勇分屬五城○丁亥允崇實奏於四川重慶設立滇餉總局○予貴州傷亡總兵官鄧鴻超祭葬世職建祠○戊子定五城練勇緝捕章程○辛卯諭軍機大臣等張廷岳等奏東兩盟願領厄魯特人眾一摺厄魯特人眾分起安插業經福濟等將西兩盟分領情形具奏見在圖謝圖汗車臣汗東兩盟亦願呈領厄魯特所贖一半人數分布安輯辦理甚屬妥協卽著張廷岳阿爾塔什達傳知各該王公

等於該人眾到旗後妥爲撫綏約束務令日久相安並著福濟錦丕勒多爾濟文碩錫綸等將此項人眾按照該兩盟佐領多寡均攤勻散造具名冊一俟庫倫咨到卽交該管官帶領陸續起程俾臻安適將此由五百里各諭令知之○壬辰諭軍機大臣等定安桂成奏賊匪竄擾河西各軍分投進剿並請飭撥火藥等項各摺片甘陝回匪經張曜等軍截擊後未敢北犯意圖乘隙東趨見在鄂爾多斯等旗境內均有賊蹤其竄擾哈拉寨等處之賊雖經宋慶所部擊敗仍退向鹽海子一帶盤踞杜嘎爾刻由托克托城渡黃馳赴河西正可杜該逆東擾之路卽著定安等迅咨該副都統督飭達爾濟等各率所部馬隊探明賊蹤相機進紮仍一面會合宋慶等軍步隊節節追剿以殄逆氛惟河西與歸綏僅隔一河防守甚關緊要且該處南路直達榆林東北卽趨包薩該逆詭譎異

常難保不避兵而行乘虛分擾榆林爲逆匪往來熟徑劉典務當偵探賊蹤豫籌防範毋稍疏虞其歸綏包薩沿河一帶地方仍著定安桂成李宗義分飭在事將士加意嚴防左宗棠督軍西進設陝境復有蠢動後路仍費周章應如何先事圖維撥軍嚴扼之處著該大臣察度情形商同劉典妥爲辦理金順見由烏喇一帶進剿著卽會同張曜等軍分投截擊以壯聲援定安等所請火藥等項本日已諭知工部照數迅撥矣其山西應解火藥鉛丸等件李宗義卽按照該將軍等所咨隨時撥解以濟要需將此由六百里各諭令知之○諭何璟奏西路軍務情形請飭催成祿出關一摺據稱烏魯木齊各城久爲賊踞實因大兵阻於關內以致塞外逆氛猖獗近日該總兵派軍功鄧生玉等赴奇古濟木薩一帶扼紮於穆壘河地方將賊擊退又在奇臺擊賊獲勝惟成祿出關尙無

信息請飭尅期西進等語成祿克復肅州後一切部署自己妥協
何得任意遷延至今無出關消息著成祿懷遵前旨乘此塞外兇
鋒已挫迅統所部出關會同何瑄相度機宜分別剿撫妥速辦理
若再株守不進玩誤軍務自問當得何罪並著左宗棠穆圖善嚴
催該提督迅速起程不得任令延宕何瑄於成祿未到之先仍宜
督飭將弁認真防剿將此由五百里諭知左宗棠穆圖善成祿並
傳諭何瑄知之○諭馬新貽等籌款興造京口駐防官署○癸巳
廣四川劍州學額二名○甲午諭軍機大臣等棍噶扎勒參奏進
剿叛民獲勝派員開導請飭撥弓箭各摺片叛民竄擾土爾扈特
游牧地方經棍噶扎勒參會同蒙兵於六月十五日進剿殺賊七
十餘名與錫綸前奏大略相同該匪見在敗退回巢棍噶扎勒參
以兵力尙單未能進取見擬添調厄魯特官兵二百名一面派員

前往開導著福濟文碩錫綸傳知該呼圖克圖先行扼要堵守一
遇該匪出巢即著迎頭截擊毋任紛竄俟厄魯特官兵調到仍當
相機進剿迅掃逆氛該呼圖克圖需用弓箭前據錫綸奏稱已先
後撥給弓二百張箭五千枝如再有需用之處著福濟錦丕勒多
爾濟文碩錫綸酌量撥給綏遠城前次截畱火箭三百枝據棍噶
扎勒參奏稱已接該將軍咨文業經起運久未解到著定安飭令
委員迅速解往毋稍遲延棍噶扎勒參另摺奏土爾扈特郡王巴
圖捐助馬匹隨同剿賊出力已諭令理藩院議給獎敘又奏索倫
等營官兵出力所有管吐瓦強阿等業照所請給獎其在塔城剿
賊出力官兵俟軍務告蒞即由福濟等酌保著該將軍等一併傳
知該呼圖克圖將此由五百里各諭令知之○諭各直省督撫裁
減錢糧浮費○定直隸山西河南會哨章程○乙未以奉天大凌

河開墾地畝有妨牧政仍諭封禁○丙申諭軍機大臣等李宗義
奏籌商河防並添募晉勇情形一摺前因回匪竄擾河西諭令李
宗義分飭在事將士加意嚴防茲據該撫奏稱陳湜所部均已遣
撤業經鄭敦謹抽派南鎮官兵並畱精銳等營及水師十一營分
路駐紮所有河防分爲下段中段上段令李慶翱等商酌辦理其
上年所築沿河石壘並飭地方文武一律修補所奏各情尙屬周
妥惟陝省北境與晉省處處相通防守自難鬆勁中段興臨等處
河面較寬而南路吉州之龍王辿河津之禹門渡每冬冰橋早結
堵禦尤難卽著該撫飭令李慶翱嚴檄閻文忠等趕緊募晉勇四
千名於八月內成軍並調河東練勇二百名統交該臬司在吉鄉河
津之間分段扼紮以固南路見在賊竄鄂爾多斯旗境距陝之府
谷神木等邑不遠晉省北路如河曲沔陽渡等處尤應嚴防如需

添調兵勇亦必豫爲籌及母致臨時周章晉省人多怯懦所募勇丁四千是否得力營兵於額餉外日加銀二分以示體恤原無不可惟須汰弱留強一兵得一兵之用斯爲餉不虛糜該撫其督飭李慶朝實力奉行毋負委任歸綏一帶仍當與定安等隨時籌防並知照張曜宋慶各軍與該處防剿等營互相聯絡俾壯聲援再兵之強弱轉移在將該省見在有無得力將弁亦當隨時留意察看用資調遣將此由五百里諭令知之○山西巡撫李宗羲奏回匪侵入蒙境官軍截擊獲勝得旨著卽知照宋慶督飭蔣東才等實力進剿毋任逆賊東趨○丁酉諭軍機大臣等都興阿等奏奉天擎獲賊匪請仍照軍務省分按照成案辦理一摺據稱奉天地方股匪橫行雖經官軍節次剿除而賊匪尙未淨絕所有該省擎獲馬賊及土匪擾害鄉里勒索貲財降勇聚眾滋事者於訊明後

請照軍務省分援照成案就地正法並請飭吉林黑龍江將軍一體遵辦等語匪徒擾害閭閻最堪痛憾奉天根本重地尤應除莠以安善良嗣後奉天拏獲賊匪卽著照都興阿等所請從嚴懲辦如遇有臨時拒捕者卽行格殺勿論惟該匪此拏彼竄是其慣技吉林黑龍江地方豈容此等匪徒肆行擾害著富明阿德英按照奉天所辦章程一律辦理如日後該三省盜風稍息再由該將軍等隨時奏明以復舊章將此各諭令知之○己亥諭軍機大臣等定安桂成奏豫軍截剿竄匪獲勝詳細情形一摺回匪竄擾鹽海子一帶經提督蔣東才等追剿斃賊甚多據獲賊供稱賊首穆壽馬老均已陣斃惟李五舉及餘匪均向西南逃竄見在復有回匪竄至烏紳旗境打虎旗一帶蔣東才已帶所部探剿宋慶又派三營前往會剿著卽飭令迅速前進務將竄擾該處之賊痛加剿洗

悉數殲除並咨令杜嘎爾督飭達爾濟等各率所部聯絡宋慶張曜兩軍確探賊蹤迅速兜擊毋任分股東趨河西賊股不一常在磴口等處掠糧金順前由達拉特旗進發見在行抵何處近日勦辦情形若何著懷遵疊次諭旨會同張曜等軍分投截勦妥籌策應歸綏沿河一帶定安等仍當督飭各軍加意嚴防毋稍大意宋慶派員勦賊頗知緩急此次在鹽海子殺賊出力員弁著准其擇尤彙案保奏將此由五百里各諭令知之○是月豁免湖南晃州廳被擾上年民欠錢糧緩山西吉林被擾民借倉穀陝西蒲城縣被旱上忙錢糧